



«18» հոկտեմբերի 2023 թ.

ք. Վանաձոր

ՈՐՈՇՈՒՄ N

ՎԱՐՉԱԿԱՆ ՏՈՒՅԺ ՆՇԱՆԱԿԵԼՈՒ ՄԱՍԻՆ

ՀՀ առողջապահական և աշխատանքի տեսչական մարմնի (այսուհետ նաև՝ Տեսչական մարմին) հյուսիսային տարածքային կենտրոնի պետ Արման Ոսկանյանս, ուսումնասիրելով.

1) ՀՀ առողջապահության նախարարի կողմից 2023 թվականի մարտի 21-ի թիվ ՎԳ/14.1/6521-2023 գրությամբ ներկայացված փաստական հանգամանքները,

2) Տեսչական մարմնի ղեկավարի 2023 թվականի հուլիսի 07-ի թիվ ՎՎ-1814-Ա հրամանը՝ «Վարչական վարույթ հարուցելու և «ՖԱՐՄ Ա.Բ.Ա» սահմանափակ պատասխանատվությամբ ընկերությանը պատկանող դեղատանը զննում իրականացնելու մասին»,

3) 2023 թվականի հուլիսի 07-ի վարչական վարույթ հարուցելու և զննում իրականացնելու մասին թիվ 06/14909-2023 ծանուցումը,

4) 2023 թվականի հուլիսի 20-ի և 2023 թվականի օգոստոսի 22-ի զննման արձանագրությունները,

5) 2023 թվականի օգոստոսի 04-ի վարչական վարույթի ժամկետը երկարաձգելու մասին որոշումը,

6) 2023 թվականի օգոստոսի 24-ի լսման մասին թիվ 17/18908-2023 ծանուցումը,

7) վարչական իրավախախտման վերաբերյալ 2023 թվականի սեպտեմբերի 27-ի թիվ 1685 արձանագրությունը,

8) 2023 թվականի սեպտեմբերի 28-ի վարչական իրավախախտման վերաբերյալ գործի քննությանը մասնակցելու մասին թիվ 17/21471-2023 ծանուցումը.

Պարզեցի

1. Նկարագրական մաս

Հիմք ընդունելով ՀՀ առողջապահության նախարարի 2023 թվականի մարտի 21-ի թիվ ՎԳ/14.1/6521-2023 գրությունը և ղեկավարվելով «Վարչարարության հիմունքների և վարչական վարույթի մասին» ՀՀ օրենքի 30-րդ հոդվածի 1-ին մասի «բ» կետով, Տեսչական մարմնում 2023 թվականի հուլիսի 07-ին հարուցվել է թիվ 070723-1789 վարչական վարույթը՝ ՀՀ, Շիրակի մարզ, Գյումրի համայնք, Գարեգին Նժդեհի փողոց 3/3 հասցեում գտնվող «ՖԱՐՄ Ա.Բ.Ա» սահմանափակ պատասխանատվությամբ ընկերությանը (ՀՎՀՀ՝ 08426408) (այսուհետ նաև՝ Ընկերություն) պատկանող դեղատանը «Դեղերի մասին» ՀՀ օրենքի 25-րդ հոդվածի 2-րդ մասով և ՀՀ կառավարության 2002 թվականի հունիսի 29-ի «Հայաստանի Հանրապետությունում դեղերի արտադրության, դեղատնային գործունեության, կազմակերպությունների կամ անհատ ձեռնարկատերերի կողմից բժշկական օգնության և սպասարկման իրականացման, դեղերի մեծածախ իրացման լիցենզավորման կարգերը և նշված գործունեությունների իրականացման լիցենզիայի ձևերը հաստատելու մասին» N 867 որոշման հավելված 3-ի 43.1-րդ կետով սահմանված պահանջների պահպանումը պարզելու նպատակով:

Հիմք ընդունելով «Վարչարարության հիմունքների և վարչական վարույթի մասին» ՀՀ օրենքի 45-րդ հոդվածի 5-րդ մասը՝ հարուցված վարչական վարույթի շրջանակներում Տեսչական մարմնի մասնագետները զննում իրականացնելու նպատակով 2023 թվականի հուլիսի 20-ին այցելել են ՀՀ, Շիրակի մարզ, Գյումրի համայնք, Գարեգին Նժդեհի փողոց 3/3 հասցեում գտնվող «ՖԱՐՄ Ա.Բ.Ա» ՍՊ ընկերությանը պատկանող դեղատուն, սակայն աշխատանքային խմբին զննում իրականացնել չի հաջողվել՝ տնօրենի քաղաքից բացակայության պատճառով: Տվյալ պահին դեղատունը գործում էր և իրականացնում դեղատնային գործունեություն:

2023 թվականի հուլիսի 25-ին կազմվել է թիվ 842-Ա զննման հրամանը և դրա վերաբերյալ ծանուցումը Ընկերությանը ուղարկվել է փոստային առաքմամբ (LO110509228AM, 25.07.2023 թ.): Ընկերության տնօրեն Արամո Բադեյանը նշված հրամանը և դրա վերաբերյալ ծանուցումը ևս չի ստացել:

Հարուցված վարչական վարույթի շրջանակներում Տեսչական մարմինը 2023 թվականի օգոստոսի 02-ի թիվ 06/16994-2023 գրությամբ դիմել է ՀՀ առողջապահության նախարարություն՝ ՀՀ, Շիրակի մարզ, Գյումրի համայնք, Գարեգին Նժդեհի փողոց 3/3 հիվանդանոց հասցեում գործող «ՖԱՐՄ Ա.Բ.Ա» ՍՊ ընկերության կողմից ՀՀ կառավարության 2002 թվականի հունիսի 29-ի N 867 որոշման հավելված 3-ի 43.1-րդ կետով սահմանված փաստաթղթերը ՀՀ առողջապահության նախարարություն ներկայացված լինելու վերաբերյալ տեղեկատվություն ստանալու նպատակով:

2023 թվականի հուլիսի 07-ին հարուցված թիվ 070723-1789 վարչական վարույթի ժամկետը սույն թվականի օգոստոսի 04-ին երկարաձգվել է մինչև 2023 թվականի սեպտեմբերի 04-ը:

2023 թվականի օգոստոսի 07-ի թիվ ԱԱ/14/17999-2023 գրությամբ ՀՀ առողջապահության նախարարության կողմից ստացվել է տեղեկատվություն, որի համաձայն «ՖԱՐՄ Ա.Բ.Ա» սահմանափակ պատասխանատվությամբ ընկերությանը (ՀՎՀՀ՝ 08426408) ՀՀ, Շիրակի մարզ, Գյումրի համայնք, Գարեգին Նժդեհի փողոց 3/3 հիվանդանոց հասցեում, Առողջապահության նախարարի 2022 թվականի հունիսի 21-ի թիվ 2600-Ա հրամանով տրվել է դեղատնային գործունեության իրականացման թիվ Կ-ԴԳ-002883 անժամկետ լիցենզիան և Ընկերության կողմից լիազոր մարմին ՀՀ կառավարության 2002 թվականի հունիսի 29-ի N 867 որոշման հավելված 3-ի 43.1-րդ կետի պահանջներին համապատասխան փաստաթղթեր չեն ներկայացվել:

2023 թվականի օգոստոսի 09-ին կազմվել է թիվ 935-Ա գննման հրամանը, որը դրա վերաբերյալ ծանուցման հետ միասին Ընկերությանը ուղարկվել է փոստային առաքմամբ (LO110730734AM, 09.08.2023 թ.) և տեղադրվել է նաև հրապարակային ծանուցումների պաշտոնական ինտերնետային կայքում՝ azdarar.am-ում (նույնականացման համարը՝ 1347645, 11.08.2023թ.):

2023 թվականի օգոստոսի 09-ի թիվ 935-Ա գննման հրամանի հիման վրա 2023 թվականի օգոստոսի 22-ին ՀՀ, Շիրակի մարզ, Գյումրի համայնք, Գարեգին Նժդեհի փողոց 3/3 հիվանդանոց հասցեում գտնվող «ՖԱՐՄ Ա.Բ.Ա» սահմանափակ պատասխանատվությամբ ընկերությանը պատկանող դեղատանն իրականացվել է գննում: Զննմամբ պարզվել է, որ դեղատունը գործում է և իրականացնում դեղատնային

գործունեություն: Զնման պահին դեղատանը աշխատում էր դեղագործ Անժելա Պետրոսյանը, ով ներկայացրեց միայն իր վերապատրաստման վկայականը:

2023 թվականի հուլիսի 07-ի թիվ ՎՎ-1814-Ա հրամանով հարուցված վարչական վարույթի ընթացքում ձեռք բերված փաստական տվյալների վերլուծության և համադրման արդյունքում պարզվել է, որ «ՖԱՐՄ Ա.Բ.Ա» սահմանափակ պատասխանատվությամբ ընկերության տնօրեն Արամո Բադեյանի կողմից գործունեությունն սկսելուց առնվազն հինգ աշխատանքային օր առաջ ՀՀ առողջապահության նախարարություն չեն ներկայացվել համապատասխան փաստաթղթերը:

Արդյունքում պարզվել է, որ խախտվել են ՀՀ կառավարության 2002 թվականի հունիսի 29-ի «Հայաստանի Հանրապետությունում դեղերի արտադրության, դեղատնային գործունեության, կազմակերպությունների կամ անհատ ձեռնարկատերերի կողմից բժշկական օգնության և սպասարկման իրականացման, դեղերի մեծածախ իրացման լիցենզավորման կարգերը և նշված գործունեությունների իրականացման լիցենզիայի ձևերը հաստատելու մասին» N 867 որոշման հավելված 3-ի 43.1-րդ կետով սահմանված պահանջները:

Ղեկավարվելով «Վարչարարության հիմունքների և վարչական վարույթի մասին» ՀՀ օրենքի 37-րդ և 38-րդ հոդվածի 1-ին մասի պահանջներով, հարուցված վարչական վարույթի բազմակողմանիությունը, լրիվությունը և օբյեկտիվությունն ապահովելու նպատակով, 2023 թվականի օգոստոսի 24-ի թիվ 17/18908-2023 ծանուցումով (ծանուցումը տեղադրվել է նաև հրապարակային ծանուցումների պաշտոնական ինտերնետային կայքում՝ azdarar.am-ում, նույնականացման համարը՝ 1354252, 25.08.2023թ.) «ՖԱՐՄ Ա.Բ.Ա» սահմանափակ պատասխանատվությամբ ընկերության տնօրեն Արամո Բադեյանը կամ իր կողմից լիազորված անձը (լիազորագրով, անձը հաստատող փաստաթղթով) հրավիրվել են մասնակցելու 2023 թվականի սեպտեմբերի 04-ին ժամը 12:00-ին Տեսչական մարմնի հյուսիսային տարածքային կենտրոնում (ՀՀ, Լոռու մարզ, ք.Վանաձոր, Գարեգին Նժդեհի 14) կայանալիք վարչական վարույթի փաստական հանգամանքների վերաբերյալ կազմակերպված լսմանը: «ՖԱՐՄ Ա.Բ.Ա» սահմանափակ պատասխանատվությամբ ընկերության կողմից ոչ ոք լսմանը չի ներկայացել:

«ՖԱՐՄ Ա.Բ.Ա» սահմանափակ պատասխանատվությամբ ընկերության տնօրեն Արամո Բադեյանը, 2023 թվականի սեպտեմբերի 05-ի թիվ 17/19785-2023 ծանուցմամբ հրավիրվել է մասնակցելու Տեսչական մարմնի հյուսիսային տարածքային կենտրոնի Գյումրու բաժնում (ՀՀ, Շիրակի մարզ, քաղաք Գյումրի, Անի թաղամաս 5-րդ փողոց, 8-րդ շենք, «Գյումրու Սուրբ Գրիգոր Նարեկացու անվան պոլիկլինիկա» ՓԲԸ) 2023 թվականի սեպտեմբերի 27-ին կայանալիք վարչական իրավախախտումների վերաբերյալ արձանագրության կազմմանը, որին վերջինս չի ներկայացել:

Հիմք ընդունելով Վարչական իրավախախտումների վերաբերյալ ՀՀ օրենսգրքի 255-րդ հոդվածը՝ 2023 թվականի սեպտեմբերի 27-ին կազմվել է վարչական իրավախախտումների վերաբերյալ թիվ 1685 արձանագրությունը, որի մեկ օրինակը վարչական իրավախախտումների վերաբերյալ գործի քննության 2023 թվականի սեպտեմբերի 28-ի թիվ 17/21471-2023 ծանուցման հետ միասին «ՖԱՐՄ Ա.Բ.Ա» սահմանափակ պատասխանատվությամբ ընկերության տնօրեն Արամո Բադեյանին ուղարկվել է փոստային առաքմամբ (LO11473832AM, 29.09.2023 թ.) և տեղադրվել է նաև հրապարակային ծանուցումների պաշտոնական ինտերնետային կայքում՝ azdarar.am-ում (նույնականացման համարը՝ 1385621, 12.10.2023 թ.):

2. Պատճառաբանական մաս

Վարչական մարմինը հաստատված է համարում, որ «ՖԱՐՄ Ա.Բ.Ա» սահմանափակ պատասխանատվությամբ ընկերության տնօրեն Արամո Բադեյանի կողմից խախտվել են ՀՀ կառավարության 2002 թվականի հունիսի 29-ի «Հայաստանի Հանրապետությունում դեղերի արտադրության, դեղատնային գործունեության, կազմակերպությունների կամ անհատ ձեռնարկատերերի կողմից բժշկական օգնության և սպասարկման իրականացման, դեղերի մեծածախ իրացման լիցենզավորման կարգերը և նշված գործունեությունների իրականացման լիցենզիայի ձևերը հաստատելու մասին» N 867 որոշման հավելված 3-ի 43.1-րդ կետով սահմանված պահանջները:

2023 թվականի հոկտեմբերի 18-ին, ժամը 11:00-ին Տեսչական մարմնի հյուսիսային տարածքային կենտրոնում (ՀՀ, Լոռու մարզ, քաղաք Վանաձոր, Գ.

Նժդեհի 14) տեղի է ունեցել վարչական իրավախախտումների վերաբերյալ գործի քննությունը, որն իրականացրել է կենտրոնի պետ Արման Ոսկանյանը: Ընկերության տնօրեն Արամո Բադեյանը պատշաճ կերպով ծանուցվել է գործի քննության կայացման տեղի և ժամանակի մասին, չի ներկայացրել միջնորդություն գործի քննության տեղը և ժամը տեղափոխելու վերաբերյալ և չի ներկայացել գործի քննությանը:

Վարչական իրավախախտումների վերաբերյալ ՀՀ օրենսգրքի 267-րդ հոդվածի համաձայն՝ վարչական իրավախախտման վերաբերյալ գործը քննվում է վարչական պատասխանատվության ենթարկվող անձի ներկայությամբ: Գործը կարող է այդ անձի բացակայությամբ քննվել միայն այն դեպքերում, երբ տվյալներ կան գործի քննության տեղի և ժամանակի մասին նրան ժամանակին ծանուցելու վերաբերյալ և եթե նրանից միջնորդություն չի ստացվել գործի քննությունը հետաձգելու մասին:

Վարչական իրավախախտումների վերաբերյալ գործի քննության արդյունքում վարչական մարմինը, քննելով գործում առկա բոլոր փաստական հանգամանքները, հաստատված է համարում, որ կատարվել է վարչական իրավախախտում, որի համար պատասխանատու է «ՖԱՐՄ Ա.Բ.Ա» սահմանափակ պատասխանատվությամբ ընկերության տնօրեն Արամո Բադեյանը (անձնագիր՝ AP0406709, տրված՝ 25.06.2015թ. 031-ի կողմից, հասցեն՝ ՀՀ, Գեղարքունիքի մարզ, Վ. Համբարձումյան փողոց, տուն 23):

Վերջինիս կողմից վարչական իրավախախտում կատարելու մեջ առկա չեն Վարչական իրավախախտումների վերաբերյալ ՀՀ օրենսգրքի 33-րդ և 34-րդ հոդվածներով սահմանված վարչական պատասխանատվությունը մեղմացնող կամ ծանրացնող հանգամանքներ:

Վարչական իրավախախտումների վերաբերյալ ՀՀ օրենսգրքի 9-րդ հոդվածի համաձայն՝ վարչական իրավախախտում (զանցանք) է համարվում պետական կամ հասարակական կարգի, սեփականության, քաղաքացիների իրավունքների և ազատությունների, կառավարման սահմանված կարգի դեմ ոտնձգվող հակաիրավական, մեղավոր (դիտավորյալ կամ անզգույշ) այնպիսի գործողությունը կամ անգործությունը, որի համար օրենսդրությամբ նախատեսված է վարչական պատասխանատվություն: Նշված իրավանորմից հետևում է, որ օրենսդիրը

վարչական իրավախախտման առկայության հիմքում դրել է մեղքի առկայությունը, որը կարող է դրսևորվել դիտավորությամբ կամ անզգուշությամբ:

Վարչական մարմինը գտնում է, որ «ՖԱՐՄ Ա.Բ.Ա» սահմանափակ պատասխանատվությամբ ընկերության տնօրեն Արամո Բադեյանի կողմից իրավախախտումը կատարվել է անզգուշությամբ:

Վարչական իրավախախտումների վերաբերյալ ՀՀ օրենսգրքի 11-րդ հոդվածի համաձայն՝ վարչական իրավախախտումը համարվում է անզգուշությամբ կատարված, եթե այն կատարած անձը կանխատեսել է իր գործողության կամ անգործության վնասակար հետևանքների առաջացման հնարավորությունը, բայց թեթևամտորեն հույս է ունեցել կանխելու դրանք կամ չի կանխատեսել այդպիսի հետևանքներ առաջանալու հնարավորությունները, թեև պարտավոր էր և կարող էր կանխատեսել դրանք: Ընկերության տնօրեն Արամո Բադեյանը չի կանխատեսել այդպիսի հետևանքների առաջանալու հնարավորությունները, թեև պարտավոր էր և կարող էր կանխատեսել դրանք:

«ՖԱՐՄ Ա.Բ.Ա» սահմանափակ պատասխանատվությամբ ընկերության տնօրեն Արամո Բադեյանը ՀՀ օրենսդրությամբ սահմանված կարգով քաղաքացիաիրավական և վարչաիրավական հարաբերություններում հանդես է գալիս որպես Ընկերության տնօրեն՝ պաշտոնատար անձ:

Վարչական իրավախախտումների վերաբերյալ ՀՀ օրենսգրքի 14-րդ հոդվածի համաձայն՝ պաշտոնատար անձինք ենթակա են վարչական պատասխանատվության այնպիսի վարչական իրավախախտումների համար, որոնք կապված են կառավարման կարգի, պետական ու հասարակական կարգի, բնության, բնակչության առողջության պահպանության ոլորտում սահմանված կանոնները և մյուս այն կանոնները չպահպանելու հետ, որոնց կատարման ապահովումը մտնում է նրանց պաշտոնական պարտականությունների մեջ:

Վարչական իրավախախտումների վերաբերյալ ՀՀ օրենսգրքի 158.1-րդ հոդվածի 1-ին մասի համաձայն՝ դեղատնային գործունեության լիցենզավորված անձի կողմից Հայաստանի Հանրապետությունում դեղատնային գործունեության իրականացման ընթացքում լիցենզավորման պարտադիր պահանջները կամ պայմանները խախտելը, եթե դրանք չեն առաջացրել «Լիցենզավորման մասին»

Հայաստանի Հանրապետության օրենքով սահմանված պատասխանատվություն՝ առաջացնում է նախազգուշացում:

3. Եզրափակիչ մաս

Ղեկավարվելով Վարչական իրավախախտումների վերաբերյալ ՀՀ օրենսգրքի 230-րդ, 279-րդ, 281-րդ, 283-րդ հոդվածներով և 282-րդ հոդվածի 1-ին մասով՝

Որոշեցի

1. Արամո Բադեյանին (անձնագիր՝ AP0406709, տրված՝ 25.06.2015թ. 031-ի կողմից)՝ որպես խախտում թույլ տված անձի, ՀՀ կառավարության 2002 թվականի հունիսի 29-ի «Հայաստանի Հանրապետությունում դեղերի արտադրության, դեղատնային գործունեության, կազմակերպությունների կամ անհատ ձեռնարկատերերի կողմից բժշկական օգնության և սպասարկման իրականացման, դեղերի մեծածախ իրացման լիցենզավորման կարգերը և նշված գործունեությունների իրականացման լիցենզիայի ձևերը հաստատելու մասին» N 867 որոշման հավելված 3-ի 43.1-րդ կետով սահմանված պահանջները խախտելու համար Վարչական իրավախախտումների վերաբերյալ ՀՀ օրենսգրքի 158.1-րդ հոդվածի 1-ի մասով ենթարկել վարչական տույժի՝ նախազգուշացնել:

2. Սույն որոշումը ծանուցել «ՖԱՐՄ Ա.Բ.Ա» սահմանափակ պատասխանատվությամբ ընկերության տնօրեն Արամո Բադեյանին, հասցե՝ ՀՀ, Գեղարքունիքի մարզ, Վ. Համբարձումյան փողոց, տուն 23 հասցեով:

3. Սույն վարչական ակտն ուժի մեջ է մտնում վարույթի մասնակիցներին իրազեկելու հաջորդող օրվանից:

4. Սույն որոշումը՝ ստանալու օրվանից 30 օրվա ընթացքում, կարող է բողոքարկվել ակտն ընդունած Տեսչական մարմին, կամ ՀՀ վարչական դատավարության օրենսգրքի 72-րդ հոդվածով սահմանված ժամկետում՝ ՀՀ վարչական դատարան:

5. Իրերի և փաստաթղթերի հարցը լուծվել է:

ՀՅՈՒՄԻՍԱՅԻՆ ՏԱՐԱԾՔԱՅԻՆ

ԿԵՆՏՐՈՆԻ ՊԵՏ՝



ԱՐՄԱՆ ՈՍԿԱՆՅԱՆ



2023 թվականի հոկտեմբերի 18

Վանաձոր

Ինձ բացատրվել է, որ համաձայն Վարչական իրավախախտումների վերաբերյալ ՀՀ օրենսգրքի 305-րդ հոդվածի 1-ին մասի, տուգանքը պետք է վճարվի տուգանք նշանակելու մասին որոշումը հանձնելու օրվանից ոչ ուշ, քան տասնհինգ օրվա ընթացքում, իսկ այդ որոշումը գանգատարկելու կամ բողոքարկելու դեպքում՝ գանգատը կամ բողոքը առանց բավարարման թողնելու մասին ծանուցման օրվանից ոչ ուշ, քան տասնհինգ օրվա ընթացքում:

Ծանոթություն՝

Իրավախախտման համար կիրառվող տուգանքի վճարման պետությունից հաշվի համարը՝ ՀՀ առողջապահական և աշխատանքի տեսչական մարմնի կողմից իրավախախտումների համար կիրառվող տուգանքների և պատժամիջոցների մուտքեր N900005024097:

Որոշումը ստացա

(անունը, հայրանունը, ազգանունը, պաշտոնը, ամսաթիվը)

Որոշումը ստանալուց և ստորագրելուց հրաժարվելու մասին նշում

Նշում որոշումը պատվիրված փոստով ուղարկելու և ստանալու ծանուցման մասին

(ուղարկելու ամսաթիվը, փոստային առաքանու համարը, փոստային առաքանին հասցեատիրոջը հանձնելու վերաբերյալ ծանուցագրի համարը)